

11 SEP 2000

Seminar-Kebatinan

TIMBALAN PERDANA MENTERI DIJANGKA RASMIKAN SEMINAR AJARAN KEBATINAN

KUALA LUMPUR, 11 Sept (Bernama) -- Timbalan Perdana Menteri Datuk Seri Abdullah Ahmad Badawi dijangka merasmikan seminar kebatinan serantau anjuran bersama Kolej Universiti Islam Malaysia (KUIM) serta Jabatan Kemajuan Islam Malaysia (JAKIM), Jumaat ini.

Dalam Kenyataan akhbar yang dikeluarkan KUIM hari ini, seminar yang bertemakan "Ke Arah Pembasmian Kebatilan Dalam Ajaran Kebatinan" itu akan berlangsung di kolej KUIM di sini dengan pembentangan kertas kerja oleh cendekiawan dari dalam dan luar negeri.

Kenyataan itu menyebut kertas kerja yang akan dibentangkan antara lain menyentuh beberapa topik seperti pengaruh batiniah, pemikiran umat Islam serta pengaruhnya di samping menyentuh mengenai aspek penyelewengan akidah dan syariah di negara jiran seperti Indonesia dan Singapura.

Antara pembentang kertas kerja ialah Prof Dr Abdul Fattah Haron Ibrahim, Prof Datuk Dr Abdul Shukor Hj Husin, kedua-duanya dari Universiti Kebangsaan Malaysia serta pensyarah jemputan seperti Pehin Datuk Haji Awang Suhaili (Brunei), Prof Dr Haji Ali Ya'kub Matondang dan Drs. Fakrurrozy (Indonesia) serta Ustaz Mohd Haniff Hassan (Singapura).

Lebih 200 peserta dari institusi pengajian tinggi, wakil jabatan agama, mufti negeri, agensi kerajaan dan orang perseorangan dijangka menyertai seminar ini yang turut dibuka kepada orang ramai.

Sementara itu, pengerusi KUIM Datuk Dr Yusof Nor berkata tapak tetap kampus KUIM akan diputuskan menjelang penghujung bulan ini.

"Beberapa negeri telah menawarkan tanah untuk dijadikan tapak tetap kampus KUIM tetapi pihak KUIM lebih berminat terhadap lokasi yang berhampiran dengan ibu negara," katanya pada sidang media mengenai penganjuran seminar kebatinan serantau di kampus sementara KUIM di Institut Profesional Baitumal di sini.

Katanya keputusan mengenai kampus tetap KUIM akan dibuat setelah perbincangan dengan Kementerian Pendidikan serta Perdana Menteri Datuk Seri Dr Mahathir Mohamad dibuat.

Ini bagi membolehkan KUIM menempatkan sehingga 5,000 pelajar menjelang akhir tahun 2004.

-- BERNAMA

AT AHH LAT